

Na osnovu člana 61. stav (9) Zakona o vodama ("Službene novine Federacije BiH", broj 70/06), federalni ministar okoliša i turizma, uz saglasnost federalnog ministra poljoprivrede, vodoprivrede i šumarstva, donosi

**PRAVILNIK  
O IZMJENAMA I DOPUNAMA PRAVILNIKA O  
POSTUPCIMA I MJERAMA U SLUČAJEVIMA  
AKCIDENATA NA VODAMA I OBALNOM VODNOM  
ZEMLJIŠTU**

Član 1.

U Pravilniku o postupcima i mjerama u slučajevima akcidenta na vodama i obalnom vodnom zemljištu ("Službene novine Federacije BiH", broj 71/09 i 102/18, u daljem tekstu: Pravilnik) član 6. mijenja se i glasi:

"U slučaju nastanka incidentnog zagađenja, svako pravno ili fizičko lice u vezi s čijim je djelovanjem ili propustom nastala opasnost od zagađenja voda i obalnog vodnog zemljišta, dužno je poduzeti sve potrebne mjere za sprečavanje ili ublažavanje uticaja prouzrokovanih incidentnim zagađenjem, spriječiti ponovni nastanak incidenta, a zatim odmah, bez odlaganja o tome obavijestiti najbližu policijsku upravu odnosno najbliži operativni centar civilne zaštite koji imaju dežurni telefon 24 sata.

Policijska uprava ili operativni centar civilne zaštite iz stava 1. ovog člana informaciju o dojavi o nastalom zagađenju, odnosno opasnosti od zagađenja vode, prosljeđuje najbližoj općinskoj/kantonanoj/federalnoj vodnoj inspekciji koja obavještava nadležnog okolišnog inspektora i nadležnu agenciju za vode.

Općinska/kantonalna/federalna vodna i okolišna inspekcija i mjesno nadležna agencija za vode, dužne su osigurati kontakt broj dostupan 24 sata za prijem dojava o incidentnim situacijama. Kontakt brojevi trebaju biti istaknuti na web stranicama nadležnih tijela.

Nadležna agencija za vode dužna je da, u saradnji sa nadležnim općinskim/kantonalnim/federalnim vodnim i okolišnim inspektorom neposredno po saznanju o zagađenju voda ili nastanku opasnosti od zagađenja, odmah bez odlaganja, angažuje lokacijski najbližu ovlaštenu laboratoriju za uzimanje uzoraka vode.

Ovlaštena laboratorija iz stava 4. ovog člana uzet će uzorke vode, te na licu mjesta izvršiti mjerenje osnovnih fizičko-hemijskih parametara i dostaviti u što kraćem roku uzete uzorke nadležnoj agenciji za vode na dalju analizu i Izvještaj na obrascu izrađenom prema zahtjevu standarda BAS EN ISO 17025, sa rezultatima mjerenja potpisan od strane odgovorne osobe i sve terenske obrasce potpisane od strane lica koja su izvršila uzorkovanje i mjerenje na terenu, a sve u skladu sa standardom BAS EN ISO 17025.

Nadležna agencija za vode će rezultate daljnje analize i uzoraka iz stava 5. ovog člana, izvršiti samostalno ili putem ovlaštene laboratorije i dostaviti u što kraćem roku federalnom vodnom inspektoru radi postupanja u skladu sa članom 7. stav 2. Pravilnika.

Troškove preduzetih mjera na otklanjanju posljedica incidentnog zagađenja snosi pravno i fizičko lice čija je radnja ili propuštanje radnje izazvalo zagađenje ili opasnost od zagađenja, u skladu s rješenjem koje donosi nadležni inspektor.

U slučaju kada je zagađivač nepoznat, troškove preduzetih mjera na otklanjanju posljedica incidentnog zagađenja snosi Fond za zaštitu okoliša Federacije BiH u skladu sa članom 3. Zakona o Fondu za zaštitu okoliša Federacije BiH ("Službene novine Federacije BiH", broj 33/03)."

Član 2.

U članu 7. stav 2. mijenja se i glasi:

"Federalni vodni inspektor će rješenjem utvrditi stepen ugroženosti."

U stavu (3) iza riječi "proglašava" dodaje se riječ "nadležni", a iza riječi "vode" dodaju se riječi "iz stava 2. ovog člana rješenjem".

Iza stava 3. dodaju se novi st. 4. i 5. koji glase:

"Metodologiju za procjenu rizika za incidentna zagađenja iz stava 3. tač.1., 2. i 3. ovog člana izrađuju agencije za vode u saradnji sa kantonalnim ministarstvima nadležnim za vode.

Na osnovu metodologije iz stava 4. ovog člana, nadležna agencija za vode za cjelokupno vodno područje kojim upravlja u saradnji sa Fondom za zaštitu okoliša Federacije BiH dužni su izraditi Procjenu rizika za incidentna zagađenja voda i istu objaviti na svojim službenim web stranicama."

Član 3.

Član (9) mijenja se i glasi:

"Pojedinačne mjere u slučaju incidentnih zagađenja i načini provođenja utvrđuju se Operativnim planovima za incidentna zagađenja.

Za incidentna zagađenja I i II stepena ugroženosti primjenjuju se mjere utvrđene Operativnim planovima agencija za vode, a za incidentna zagađenja III stepena ugroženosti primjenjuju se mjere utvrđene federalnim Operativnim planom.

Operativne planove za incidentna zagađenja I i II stepena ugroženosti pripremaju i provode agencije za vode na vodnom području kojim upravljaju.

Operativni plan za incidentna zagađenja III stepena ugroženosti pripremaju nadležne agencije za vode u saradnji sa Fondom za zaštitu okoliša Federacije BiH, a provode ga nadležne institucije zadužene za provođenje operativnog plana.

Operativne planove iz st. 3. i 4 ovog člana, na prijedlog nadležne agencije za vode, donosi ministar uz saglasnost federalnog ministra nadležnog za vode, koji se objavljuju u "Službenim novinama Federacije BiH" i web stranicama agencija za vode i nadležnih ministarstava.

Agencije za vode, u saradnji sa Fondom za zaštitu okoliša Federacije BiH, dužne su organizovati najmanje godišnju provjeru operativnih planova iz st. 3. i 4. ovog člana u vidu obuke svih funkcijskih jedinica plana na određenu simuliranu incidentnu situaciju."

Član 4.

Član 10. mijenja se i glasi:

"U rješenju iz člana 7. stav 2. Pravilnika, nalažu se i mjere utvrđene u operativnom planu iz člana 9. stav 2. Pravilnika.

Rješenje iz stava 1. ovog člana nadležni inspektor odmah, bez odlaganja dostavlja nadležnim institucijama zaduženim za provođenje operativnog plana, te pravnom ili fizičkom licu čija je radnja ili propuštanje radnje izazvalo zagađenje.

Nadležne institucije iz stava 2. ovog člana dužne su odmah, bez odlaganja objaviti rješenje iz stava 1. ovog člana na svojim službenim web stranicama."

Član 5.

U Poglavlju III. naziv odjeljka: "Mjere u slučajevima incidentnog zagađenja kod I i II stepena ugroženosti" mijenja se i glasi: "Mjere u slučajevima incidentnog zagađenja kod I, II i III stepena ugroženosti".

Član 6.

U članu 14. stav 1. rimski brojevi "I i II" zamjenju se brojevima " I, II i III".

Iza stava 1. dodaju se novi st. 2. i 3. koji glase:

"Federalni vodni inspektor po prestanku ugroženosti od incidentnog zagađenja, rješenjem proglašava prestanak provođenja mjera o čemu izvještava nadležne institucije zadužene za provođenje operativnog plana.

Po prijemu izvještaja iz stava 2. ovog člana, nadležne institucije obavještavaju javnost o prestanku incidentnog zagađenja vode na svojim službenim web stranicama."

Član 7.

Čl. 15., 16., 17. i 18. brišu se.

Član 8.

Sastavni dio ovog pravilnika je Prilog A. - Šema plana postupanja i obavještavanja javnosti u slučaju incidentnog zagađenja vode.

Član 9.

Prilozi 1. 2. i 3. Pravilnika, a koji čine sastavni dio Pravilnika, brišu se.

Član 10.

(Prelazne i završne odredbe)

Metodologiju za procjenu rizika iz člana 7. stav 4. Pravilnika agencije za vode u saradnji sa kantonalnim ministarstvima nadležnim za vode izradit će u roku od dvije godine od dana stupanja na snagu ovog pravilnika.

Procjenu rizika za incidentna zagađenja voda iz člana 7. stav 5. Pravilnika, agencije za vode u saradnji sa Fondom za zaštitu

okoliša Federacije Bosne i Hercegovine, izradit će u roku od tri godine od dana stupanja na snagu ovog pravilnika.

Agencije za vode će u roku od godinu dana od dana stupanja na snagu ovog pravilnika dostaviti ministarstvu prijedlog operativnih planova iz člana 9. st. 3. i 4. Pravilnika.

Obuku iz člana 9. stav 6. Pravilnika, agencije za vode u saradnji sa Fondom za zaštitu okoliša Federacije Bosne i Hercegovine izvršit će u roku od šest mjeseci od dana objavljivanja operativnih planova u "Službenim novinama Federacije BiH".

Član 11.

(Stupanje na snagu)

Ovaj pravilnik stupa na snagu narednog dana od dana objave u "Službenim novinama Federacije BiH".

Broj 04/2-02-19-766/23

18. jula 2024. godine

Sarajevo

Ministrica

Dr. sc. **Nasiha Pozder**, s. r.

## Prilog A. Šema plana postupanja i obavještanja javnosti u slučaju incidentnog zagađenja

